

REGIONAL NEWS

HEADLINES:-

1. Supply Minister Pu B. Lalchhanzova'n ration card var hmangte tana buhfai KG-a Rs 30 ni tawh tur chuan rualkhai leh felfai zawka a kal phah ngei a rin thu a sawi.
2. Agriculture Minister Pu PC Vanlalruata'n kumina Kolasib leh Mamit a buh thar lei turin OmOm Rice Mill nen inremna ziak turin hmalak mek a ni a ti.
3. Modia sawrkar vawi thumna chuan ni 100 a ro a rel chhungin project cheng vaibelchhe nuai 15 chuang hu a hawng tawh.
4. Supreme Court chuan mipat hmeichhiatna lam ennaawm Pornography-a naupang lanna en chu POCSO Act bawhchhiatna anih thu a sawi.

<><><>

SUPPLY MINISTER

Food Civil Supplies & Consumer Affairs Minister Pu B. Lalchhanzova'n ration card var hmangte tana buhfai KG-a Rs 30 ni tawh tur chuan rualkhai leh felfai zawka a kal phah ngei a rin thu a sawi.

He thu hi vawiina Targetted Public Distribution System (TPDS) hnuaia beneficiary-te chanvo leh an harsatna chhawk zangkhai dan chungchang inhrilhhriatna Vanapa Hall, Aizawla neih a hmanpui na ah sawiin Minister chuan mi tin te mahni zawn theuhah vantlang tana tangkaina nei thei vek an ni tih sawiin retailer-te chu sawrkarin an tanghma a ngai em em tih hria a, mipuite tana thahnemngai lehzual turin a fuih a. Ration card var hmangte tana buhfai KG-a Rs 30 ni tawh tur chuan Mizona thinlung chawk thovin, rualkhai leh felfai zawka an kal phah ngei a rin thu a sawi a, TPDS beneficiary-te thliar fel dan tur chungchangah pawh sawrkarin ngaihtuahna nasa tak a sen mek thu a tarlang bawh.

He hun, 'Awareness Campaign on TPDS beneficiaries' hi TPDS hnuaia beneficiary-te chanvo leh an harsatna chhawk zangkhai dan kawnga inhrilhhriatna a nih angin, Retailer leh Local Council-te puala buatsaih a ni a. Hei bakah hian NGO hrang hrang leh Community-based Organisations (CBOs) aiawh thahnem tak an tel bawh.

<><><>

CM SASCI

Chief Minister Pu Lalduhoma hova thukhawm, State Level Committee on SASCI chuan Working Women Hostel, hmun pasariha sak dan tur an rel. State Level Committee on SASCI chairman ni bawh, Chief Minister Pu Lalduhoma hova vawiina CM Conference Halla thutkhawm ah hian, Part X of SASCI, 2024-25 atanga Working Women Hostel, hmun pasariha sak dan tur relin, PWD hotute tarlan danin, hemi sak nana sum sen tur zat chu cheng vbc 127 a ni a, SASCI part X hnuaia working hostel te hi sak a nih chuan guidelines in a sawi angin amaha inenkawl zel theia Public Private Partnership anga enkawl zui tur a ni.

A sakna hmun tur atana rawt te hi, ZMC Complex, Lunglei Ramthar veng, Thenzawl Field Veng, Ramhlun Sports Complex, ITI Complex, Aizawl, Champhai Kahrawt veng leh Khatla, Aizawlah te a ni a, a len zawng a

inang vek lova, a then chu khum 140 awm theihna tur a nih laiin a then te chu khum 40 awm theihna tur a ni thung a ni.

<><><>

GARBAGE COLLECTORS BACKDOWN

Aizawl Municipal Corporation thuneituten lirthei hman man rualkhai lak a nih theih nana hmalak an tiam avangin Aizawl Garbage Truck Owners' Association, PPP Mode Bawlhhlawh Paih Welfare leh Sanitation Driver & Handyman Association-te'n vawiin atanga tlan loh an tum chu an sût.

Aizawl khawpui Bawlhhlawh paih motor hman man rualkhai loh avangin bawlhhlawh paih motor te hian AMC thuneitute hnenah an lungawi lohna an thlen a, thu lawmawm an hmuh mai loh avangin vawiin atanga tlan loh an rel a. Amaherawh chu nimin Pathianni khan AMC Mayor leh AMC hotute nena inbiain bawlhhlawh paih motor hman man rualkhai a awm theih nan hma an lak nghal tur thu an sawi avangin vawiin atanga tlan loh an tum chu an sut leh ta a ni.

Lirthei neitute chuan lirthei hman man bitukah AMC-in tehkhawng leh behchhan mumal a nei lova, veng hlat zawng an hriat dan angin motor hman man an bithliah mai niin an sawi a; Lirthei hman man tihsan ngawr ngawr an phût lova, veng hlat zawng mila rate bithliah an phût niin an sawi a ni.

<><><>

AGRI MINISTER

Agriculture Minister Pu PC Vanlalruata'n kumina Kolasib leh Mamit a buh thar lei turin OmOm Rice Mill nen inremna ziak turin hmalak mek a ni a ti

Minister chuan Kolasib leh Mamit Buhhum chu a enchhin nan sorkar in a lei anga, support price pawh sorkarin a tum dawn tih a sawi a. OmOm Rice Mill in lei turin ruahmanna an siam bakah sawrkarin cheng 30 in buhhum kg khat a leiin support price a pe dawn tih a sawi.

Minister chuan Bana Kaih Policy-ah thlai thar hralhna tur an ngaipawimawh ber a ti a, thlai thar Wholesale a zawrhna tur Building sak nan hmun hnih an nei tawh a, ZPM Sorkarah Mizoram hmel thar a hmuh ngei a beisei tih sawiin Hand Holding Policy in a tum ber chu hmasawna tluantling leh nghet a ni a, an ngaih pawimawh ber chu thlai thar hralhna Market a ni tih a sawi.

Minister chuan Aizawl khawpui chhung hmun 4-ah thlai thar hralhna tur Wholesale Market an sa dawn a ti a, hmun 2-ah wholesale market sakna tur sum cheng veibelchhe 10-an dawng tawh tih sawiin a hmunhna tur Sihphir leh Melthumahte an en tawh tih a sawi.

<><><>

NHM

NHM Employees Union Mizoram (NEUM) chuan Mizoram sorkara an thil phut hrang hrang te tih hlawhtlin a nih loh chuan lungawi lohna lantir an tum tih an puang.

Vawiina thuchhuah an siamah NEUM chuan sorkar hmalakna an ngaichang dawn tih sawiin, hmalakna mumal a awm loh chuan September ni 26 atanga ni 28 chhungin Badge dum bela lungawi lohna lantir an tum a, hma an sawn lo a nih chuan an kal zel dan tur ngaihtuah a ni ang, an ti.

NEUM chuan Mizoram sawrkarin tun hnaia Centrally Sponsored Scheme hnuaia thawkte hamthatna tur lehkha a tichhuak chu lawmawm an ti a;

hetih mek lai hian Health and Family Welfare Department hnuaiia hna nghet lak tur thenkhat - Health Worker, Staff Nurse, Laboratory Technician, X-ray Technician leh a dangte ruahmanna leh rawtna an siamah NHM hnuaiia staff-te tana hamthatna awm thei lo zawnga mi thar vek lak theih tur anga hmalakna a kal chu tha an ti lo a ni.

An thuchhuaha tarlan a nih dan chuan, Health Department hnuaiia regular post lak tur awm reng rengah The Government of Mizoram Regularization of Centrally Sponsored Scheme (CSS) Employees Scheme 2024 chu hman an duh tih an tarlang bawk.

<><><>

SAMPOORNATA ABHIYAN

Ram chhunga District leh Block hnufualte chhawmdawl nana sawrkar laipuiin a ruahman - Sampoonata Abhiyan chu Mizorama District pathum ami ten an chhawr theih nan inhrilh kawngah chak taka hmalak mek a ni.

He hmalakna hi July thla atang khan Mizorama District pathum - Lunglei, Saitual leh Mamit District-a block chhungah beihpui thlakin hmalakna atana thlan chhuah Block pathum - Lungsen, Reiek leh Ngopa RD Block-a mipui vantlang tana hmasawna leh changkan theihna tur zaa za thlen theihtir tum a ni a, tun thla thleng awa a nih avangin Line dept. hrang hrang ten theihtawpin hna an thawka a ni.

He hmalakna chungchang a sawinaah Mamit DC Pu Jacob Lalawmpuia chuan zunthlum leh BP sang vanga thihna ram chhungah a tam hle a, Sampoonata Abhiyan hnuaiia kum 30 chung lam zawng zawng endik vek an nih chuan mahni dinhmun inhriain hmasawna a thlen dawn a ni, a ti a. Kawng hrang hrangah hmasawna tluantling a awm theih nan nasa zawka hmalakna kalpui a tul thu pawh sawiin, chumi tur chuan inpekna thuk zawk nen thawhhona tha neih a tul a ni, a ti.

Sawrkar laipui (NITI Aayog) hmalakna, Sampoonata Abhiyan hnuaiia hian thla 3 chhungin hriselna lam kaihnawih, naupai hriselna endik, naupaiin chaw tha a dawn dan, kum 30 chung lam BP leh zunthlum enfiah, Agriculture Department hnuaiia Soil Health Card siam leh Self Help Group ten tanpuina an dawn dan te chu tehnaa hmangin hma lak a ni.

<><><>

LAWNGTLAI YLA DAY

Lawngtlai District-a Tlawmngaipawl lian ber, Young Lai Association (YLA) chuan vawiin hian kum 50 a tling a, YLA Day, YLA Golden Jubilee ni bawk hi hlim tak, hlawk leh tangkai takin an hmang.

Central YLA President Pu HC Vanlalruatpuia chuan YLA Member-te Golden Jubilee duhsakna chibai a buk a, changhai riangvaite puin, khawtlang, ram leh hnam tan YLA chu a ding zel dawn, a ti. YLA Golden Jubilee-ah hian LADC Chief Executive Member, Pu C. Lalmuanthanga, Lawngtlai East MLA Dr. Lorrain Lalpekliana Chinzah, Lawngtlai West MLA Pu C. Ngunlianchnunga bakah mi langsar tak tak ten YLA chu duhsakna hlanin chibai an buk a, Lawngtlai District-a Tlawmngai pawl dangte pawn YLA member te chibai an buk bawk.

Central YLA hruaitute chuan Lawngtlaia Damdawi In pathum bakah Lairam Rescue Centre, Lairam Motherless Home leh District Jail-ah te

thilpek an hlan a, zanin hian hmun hrang hrangah Jubilee mei det a ni ang.

YLA Day, Golden Jubilee hi Branch hrang hrang chuan intihhlimna te, khawtlang tana thiltha tih nan te, mi hmingtha chawimawi nan te, midang tanpui nan te leh infuih thar nan te an hmang a ni.

YLA-ah hian Branch 119; Sub-Hqrs 7 leh Group 2 awmin member 56,000 an awm mek.

<><><>

MODI 100 DAYS

Modia sawrkar vawi thumna chuan ni 100 a ro a rel chhungin hmasawna ruhrel, social welfare, loneitute,mi naran, hmeichhia leh thalai tak project cheng vaibelchhe nuai 15 chuang hu a hawng tawh. Sawrkar chuan hmeichhiate kaihhruaiin hmasawna kawngah dinhmun nghet tak a siam a. Hmalakna a kalpui zingah hmeichhe dinhmun chawikanna, abikin thingtlang leh eibar dinhmuna hnufual zawkte tan tam tak a nei a ni.

<><><>

SUPREME COURT

Supreme Court chuan mipat hmeichhiatna lam enawm Pornography-a naupang lanna en chu POCSO Act bawhchhiatna anih thu a sawi. Supreme Court chuan rampuma court zawng zawngte hnenah thuchah siamin an thurem leh thutlukna siam reng rengah child pornography tih tawngkam chu paih vek turin a ti bawk. Madras High Court in mipat hmeichhiatna lantirna film-ah naupang telna lo en ve chu Protection of Children from Sexual Offences, or POCSO Act.POCSO Act in a huam lo ang tia a lo rel tawh chu vawiin khan Supreme Court hian a rawn thiat ta a ni.

<><><>

PM IN NY

Prime Minister Narendra Modia chuan kum zabi 21 chu technology hman uarna khawvel anih tawh avangin mipuite hamthatna turin technology leh mipui rorelna democratic value kalkawp tir a ngai a ti. Massachusetts Institute of Technology (MIT) buatsaiha New York-a tech industry hotute nen an inkawmnaah he thu hi sawiin PM Modia chuan democracy ngaihthah technology thiamna chuan buaina a siam a ti a. India hlawhtlinna sawiin theihna tam tak a awm a, democracy tha tak nei leh sumdawna tur hmun tha tak anih thu a sawi bawk a ni.

Prime Minister-in a kawmte zingah Adobe Chairman, President leh CEO Shantanu Narayen, Googel CEO Sundar Pichai, IBM CEO Arvind Krishna, Accenture CEO Julie Sweet leh midang an ni.

<><><>

SRI LANKA NEW PRESIDENT

Sri Lanka President thar Anura Kumara Dissanayake chu vawiin khan an president 9 na tura lakluh a ni. National People's Power hruaitu Anura Kumara Dissanayake hian Sri Lanka politics dinhmun thar a hruai a. Kum tam tak ro lo rel tawh political party te hnawlin party thar rorelna hnuaiah an lut dawn a ni..

<><><>